

■ GLOSSA

Esters ed asilants n'èn betg pli criminals ch'ils Svizzers

DA MURGNAC

La societad, substituida da la pressa da sensaziun, tgira in nov inimi: Esters ed asilants sco canaglia e glied criminala. Propi ver? Na in summa betg! La realitad è questa che schurnalists da gassetas da pigels prendan ina statistica pertutgant la criminalitad e preschantan questa sco studia exclusiva e train la consequenza ch'esters ed asilants sajan canaglia e criminals.

En Svizra dat ì mo ina statistica criminala chantunala che correspunda al standard internaziunal (Turitg). En ils ulteriurs chantuns s'augmenta u sa reducescha la prontadad da violenza tals esters cun la morala da statistica da la polizia. En quest mument che la polizia emplenlescha ora p.ex. ils cedels, che la procura publica federala trametta, pli exact e pli correct vegnan ils asilants pli brutals, malgrà che de facto crescha spirontamain l'exactadad da la statistica. Punct! Mummas, serrai en vos affons e stai medemamain a chasa, babs barricadai l'escha e s'armai cun revolvers pertgè la statistica vegn megliera.

Il sulet ch'ins sa dir – sin fundament da la statistica criminala pli precisa – è ch'il dumber da denunziations crescha. Dapli atgisas na muntan dentant anc ditg betg dapli violenza e dapli criminalitad. Ils esters n'èn statisticamain betg mendra glied ch'ils Svizzers, dentant è la perspectiva sa midada. Sche asilants fan ina giada in tec musica memiadad aut la notg lu vegn sa-



jettà or da fanestra e la polizia duaja metter quests feghers sin pantun. Sch'ina gruppa dal vitg chaschuna da mesa notg disturbis cun sunar sin via è quai perencunter nagin problem. Sch'indigens sa deportan sco pors en in'ustaria lu disturba quai nagin fertant che sch'in asilant mo ha il curaschi da cumparer en il medem local sto la survienta gia haver in «bodi gard.» Sche asilants stattan enturn ord spir lungurella (lavurar na dastgan els betg) ston ins tegnair en egl quella canaglia ch'engola tut quai che n'è betg enguttà.

Daco ston ils ester in summa esser megliers ch'ils Svizzers che vegnan er pli e pli tugnus, malcontentes, agressivs, dattan fridas a lur dunnas e tgisan il vischin, guardan gugent carnets e gassetas plain brutalitad ed assassins? Murgnac ha tertgà ch'ì saja scumandà da criminalisar minoritads. Areguard la criminalitad dals ester, succeda actualmain exactamain quai.

La statistica mussa nagut lauter che 51,5 per-tschient da las denunzia-

ziuns da delicts pertutgan esters. Ina atgisa na muntadentant anc ditg betg ch'ì dettia er in culpant. Ì dat studias en Svizra che mussan ch'ils esters ch'èn vegnids inculpads n'èn betg pli suvent cun culpa ch'ils Svizzers. Mo 4 da 10 Svizzers denunziads èn numnadamain mitschads da vegnir condemnads, dentant 7 da 10 esters. Il dumber da cass è creschì tar ils esters perquei che las controllas da la polizia èn vegnidadas intensivadas tar questas gruppaziuns. La statistica mussa er ch'ì dat nagina differenza significativa tranter esters che vivan en Svizra, requirents d'asil e Svizzers. Sulettamain tar las bandas estras ch'opereschan sur ils cunfins da nossa terra è il dumber creschì. Tar ils condemnads en Svizra ha ì dentant proporziunalmain dapli indigens ch'esters.

Er la comunicaziun da pressa dal departament da giustia e polizia dal Grischun tuna sco in scenari da guerra. La populaziun stoppia vegnir protegida. Dasperas vegn gnanc differenzià tranter asilants, persunas estras stablas e gruppas criminalas. Pir l'onn 2000 datti statisticas e datas unificadas en Svizra che lain er trer las gistas conclusiuns. Trametter enavos Bosniacs giuvens enstagl da schar finir quels lur emprendissadi tar nus e crair da sminuir uschè la criminalitad è in'illusium.

Etuttina. Er sche la statistica na confirmescha betg ch'ils esters èn pli criminals ch'ils Svizzers èn il Svizzers megliera glied. Era l'aura è vegnida mendra, sch'ins na risguarda betg la statistica u interpretescha quella fallà.